



Uunga siunnersuut: Aalisarneq pillugu Inatsisartut inatsisaata allanngortinnera pillugu Inatsisartut inatsisaat nr. xx, xx.xxx 2016-imeersoq. (Aalisarsinnaanermut akuersissutinik tunniussisarnerup kommunalbestyrelsinut nuunneqarnissaa pillugu aalajangersakkamik eqqussineq).

(Aalisarnermut, Piniarnermut Nunalerinermullu Naalakkersuisoq)
(Siullermeenera)

Demokraatini isumaqarpugut pisortat ingerlatsinerat sapinngisamik pitsaanerpaasariaqartoq. Manna siunnersuut aqutigalugu Naalakkersuisut periarfissinneqassapput pisortat ingerlatsinerannik naleqqussaansaminnut pisariinnerusumik ilusilimmik tamannalu nuannaarutiginnarsinnaavarput. Naalakkersuisunulli eqqaamaqqussavarput naatsorsuutigigatsigu piviusumik sipaaruteqartoqassasoq imaluunniit aningaasat assingi atorlugit pitsaaneruserumik kiffartuussisoqalerumaartoq.

Akuersissutinik tunniussisarnerup kommuninut tunniunneqarnerata saniatigut aamma isumaqarpugut sinerissamut qanittumi aalisarneq tamaat nalilersoqqittariaqaripput. Najukkani pisuussuterpassuaqarpoq soorlu qaleralinnik, eqqusanik, qeeqqanik, qeqqussanik allanillu tassani aalisarnerup najukkami allani pisuussutit kalluarneq ajorpaat.

Pisuussutit tamakku najukkami aqunneqartariaqaralarput. Taamaasiornikkut assersuutigalugu Qeqertarsuup Tunuali qaleralinniarnaq najukkami aqunneqarsinnaasariaqaralarpoq. Taamaallaat kinguneralugu sumiiffimmi aalisapiluttoqarsimappat taava immikkoortumut allamut nuuginarluni aalisaqqittoqarsinnaassanngilaq. Atuinermi assortuussuterpaalussuit ullumikkut atuuttut pinngitsoortinneqarsinnaalissagalarput.

Siunnersuutip Aalisarnermut, Piniarnermut Nunalerinermullu Ataatsimiititaliami aappassaaneerneqannginnerani oqaluuserineqarnissaa kissaatigaarput.